



Aleqa Hammond

Inatsisartuni ilaasortaq, Siumut

**Assartuussineq pillugu Isumalioqatigiissitap isumaliutissiissutaata  
nutserneqarnera pillugu § 37 naapertorlugu apeqqummut akissut**

13. maj 2011  
Sagsnr. 2011-049688  
Dok. Nr. 629583

Asasara Aleqa Hammond.

Assartuussineq pillugu Isumalioqatigiissitap isumaliutissiissutaata qaqugu kalaallisut saqqummiunneqarnissaa apeqqutigalugu saaffiginnissutinnut qujanaq. Kalaallisut saqqummernissaa pingaaruteqartorujussuusoq isumaqatigaakkit, nuannaarutigalugulu oqaatigisinnaavara nutsernera naammassingajalermat.

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: iaan@nanoq.gl  
www.nanoq.gl

Kisiannili suliaq annertoorujussuuvoq, tassani nutserneqarnerata pitsaassusia qaffasinnissaa qulakkeeruskatsigu. Kalaallisoortaata pitsaassusia sutigut tamatigut danskisoortaanut nallersuunnissaa uannut pingaaruteqarpoq. Tamatuma kingunerisaanik pitsaassuseq qulakkeerniarlugu tamakkerluni misissoqqissaarneqarpoq, isumaliutissiissullu naluneqanngitsut takisoorujussuummat – quppernerit 500-t missaanniillutik – suliaq sivilisvoq. Allaffeqarfinit ilisimatineqarpunga kapitalit tamarmik nutserneqareersimasut, maannalu pitsaassutsip qulakkeerniarneqarnera kisimi amigaataavoq, taassumalu suliarineqarnerata ullut 14-it missaannik sivilisussuseqarnissaa naatsorsuutigineqarpoq. Kisiannili kapitalit saqqummiunneqarnissaminnut piareerneqartarnerat malillugu ingerlaavartumik nittartakkamut ivertinneqartassasut isumaqatigiissutigineqarpoq. Taakkulu [www.transportkommissionen.gl](http://www.transportkommissionen.gl) -mi nassaarineqarsinnaassapput.

Assartuussineq pillugu Isumalioqatigiissitap isumaliutissiissutaata saqqummiunneqarnissaa sioqqullugu eqqarsaatersorfigisimavara, nutserneqarnera tamakkerluni aatsaat naammassipat saqqummiunneqassanersoq. Kisiannili isumaliutissiissutip tamarmiusup aallaqqaammulli oqaatsit marluk atorlugit saqqummiunneqarnissaanut sanilliullugu, Isumalioqatigiissitap inassuteqaataanik politikkikkut suliaqarnerup tamarmiusup aallartinnissaata eqqarsaatigineqarnissaa pingaarnerutissimavara. Isumaliutissiissummili kapitali naggataarutaasup (17), Isumalioqatigiissitap inassuteqaataannik inerniliinerinillu tamanik saqqummiussiffiusup nutserneqarnissaa aammalu saqqummiussinermut atatillugu nittartakkami pissarsiarineqarsinnaanissaa pingaartissimavara.

Isumalioqatigiissitap inerniliinissaa sioqqullugu aamma isumaliutissiissutip eqikkarneqarnera nutserneqareerpoq, taamatullu apriliip ulluisa aallaqqaataanni isumaliutissiissutip immikkoortui, sineriak sinerlugu imaatigut angallassinermut aamma Kalaallit Nunaata kujataani attaveqaatinut tunngasut kalaallisut pissarsiarineqarsinnaallutik. Tamanna tunngavigalugu isumaqarpunga, piffissami aggersumi innuttaasunik ataatsimiititsisaqattaaleruma, innuttaasut Isumalioqatigiissitap inassuteqaatai pillugit oqallinnissaminnut sakkussaqaqarlussasut.

Naggasiutigalugu ilisimatitsissutigisinnaavara, isumaliutissiissut tamarmiusoq naqitanngorlugu ukiamut saqqummersinneqarniarmat – soorunami oqaatsit marluusut atorlugit.

Inussiarnersumik inuulluaqqusillunga

Jens B. Frederiksen